



Sabtu, 01 Mei 2021
Ogen: Rut 2:8



Tetaplah Erdahin



Erdahin eme salah sada biak Dibata. Maka kalak simakeken waktuna secara positif guna erdahin situhuna ia ncidahken biak Dibata si mehuli bas geluhna. Kalak Kristen eme kalak si ipasu-pasu Tuhan, salah sada dalanna eme arah pendahin. Tuhan Jesus erbahan anding-andingen kinirajan surga ras perberita si meriah desken sekalak perjuma ras sierdahinna. Emaka tuhu nge, kita enda eme sierdahin I bas juma Dibata.

I bas ogenta enda pe icidahken kerna Rut, diberu si nguda denga tapi enggo mbalu. I bas situasina mbalu, ermalu-malu ia lako encukupken keperluan geluhna ras bibina Naomi. Amin lenga melala pengangkanna erdahin erjuma, la ia mela, iusur-usurna erdahin, la itimaina perkuah ate kalak man bana. Ikut-ikutna aron si sangana ngerani i juma Boas. Tapi perban langa bo iangkana janah mekuah ate Boas, ipenahangina dahin Rut. Labo perlu arak-arakna pendahin aron e, cukup deher-deherna saja guna muati guna panganna.

Secara tersirat bageme Tuhan, i bas mperdiateken keperluanlunta. Memang erkiteken kutuk dosa manusia arus ndarat panasna maka ruluh taneh si kena dampak dosa e. Tapi kuasa kehadiran Dibata man kalak simalang man baNa, ibere Tuhan kreatifitas, ibereken Tuhan gegeh ras kepentaren ngoratken pendahin e. Erkiteken pendahin ras kengasupen ndahikenca pe reh i bas Tuhan nari, patut kita ngatakan bujur, kai pe pendahinta bage pe la banci kita pandang enteng man sada pendahin/profesi. Aron ku juma, simajekken rumah kalak, pekerja pabrik eme piga-piga bidang pendahin kalak buruh. Ola kita mapas ras pandang enteng. I bas Tuhan nari kap rehna, ras mbelin kel peranna i bas menopang kegeluhen ras ekonomi masyarakat enda. Saja mari tetap sidukung arah toto gelah reh sejahterana buruh-buruh Indonesia.